

Gronda lavur, auts custs e tuttina quint positiv

Corpus Catholicum 2015/2016

■ **(anr/gc) Sco il parsura da la cumissiun administrativa dal Corpus Catholicum (baselgia catolica dal Grischun), Placi Berther, scriva en il rapport annual saja i stà da sclerir bleras dumondas en connex cun la fusiun da plaivs vischinas a basa dal nov sistem da finanzaziun.** Fusiunadas èn era las plaivs da Trun-Schlans-Zignau, Breil-Dardin-Danis-Tavanasa, Sursaissa-Mundaun e Müstair-Valchava vegnidas durant l'emprima mesadad da l'onn. Ulteriurs projects da fusiun èn in strada.

Sin l'enquista dad uestg *Vitus Huonder* pertutgant «Uvestgieu da Turitg» ed «Uvestgieu Svizra centrala» è la cumissiun administrativa vegnida a la conclusiun da na perseguir il mument ina nova partiziun da l'uestgieu. Quai na saja gnanc ina dumonda per il Corpus Catholicum.

Center catechetic

Il center catechetic – sut l'egida da *Paolo Capelli* – è, suenter in audit, vegnì riconosciù dal post da coordinaziun per la scolaziun modulara en la baselgia sco tal per ForModula. Durant ils davos onns èn divers moduls vegnids realisads (catechesa, liturgia, process spiritual ed introduziun en ils sacraments/eucaristia).

Rectorat per religiun

Tenor il rector dal post da religiun, *Vitus Dermont*, vegn il nov plan d'instrucziun introducì 2018/2019 per tuts stgalims ed il model 1:1 en la scola primara. Cun divers manaders da scola è gia vegnì discurs pertutgant il Plan d'instrucziun 21 ed il rom religiun (ductrina). Blera lavur ha il rector da religiun già cun las visitaziuns e cussegliaziuns en la scola populara da nos chantun. Là è el vegnì retschavì cordialmain, malgrà ch'ins saja stà confrun-

tà en plirs lieus cun intginas sfidas. Fatschentà fitg è il rector era stà cun la perfecziun dals magisters. Tals èn obligads da sa perfecziunar almain diesch mezs dis ad onn. Per scolasts e scolastas da religiun na valia quai dentant betg.

Paarlando – cussegliar pèrs

Al post da cussegliar pèrs e davart la vita sa drizzan – tenor ses manader *Arno Arquin* – oravant tut tals che n'èn betg cuncts u daventads indifferents en lur relaziuns. En il center da quest fitg tschertgà post, era numnà paarlando, a Cuira e Tavau (fin la fin da 2015), èn stadas cussegliaziuns da pèrs, singuls, famiglias e gruppas.

Prest tschintg milliuns francs entradas

L'entrada principala dal Corpus Catholicum è il retgav da la taglia da cultus en il Grischun. Per ils 90 000 catolics en noss chantun survegn la baselgia catolica 54,5% u 4,9 milliuns. Quai èn 85 000 francs pli pauc che l'onn precedent.

Ad 84 plaivs èn vegnidas dadas contribuziuns finanzialas en l'import dad 1,8 milliuns. A quellas plaivs, che han già en consequenza da la midada da sistem mainentradas, è vegnì dà supplementar-main 1,1 milliuns u la differenza visavi las contribuziuns veglias da golvaziun. Per contribuziuns vi da renovaziuns da baselgas ed indrizs per la pastoraziun en plaiv èn 11 dumondas vegnidas fatgas. 2,8 milliuns èn vegnids pajads per las Ovras (instituziuns) da la baselgia catolica dal Grischun. En quest importo è era la contribuziun extraordinaria da 900 000 francs per la renovaziun da la baselgia claustrala a Mustér cuntegnida.

Il quint dal Corpus Catholicum 2015/2016 serra – tar entradas da rund 9,2 milliuns – cun in gudogn da 291 000 francs.



La cumissiun administrativa dal Corpus Catholicum vegn presidiada da Placi Berther. 10